

# JAPOŠTOLSKÉ SKUTKI.

## STAW I.

Jězus slubi japoštołam Ducha swjateho a praji, zo njeje jich wěc, zo bychu zakhowane časy přichodnych podawkow znali; a po jeho donjebjesspěcu připowědataj jandželej, zo wón podobnje zaso přińdže. Mjena japoštołow. Pětrowa rěč za powołanje jenoho na Judašowe město, na kotrež bu po modlitwje Matij z losom wuzwoleny.

**P**rěnje slowo\* spisach wo wšitkim, o Theofilo, štož Jězus poča činić a wučić,

2. Hač do dnja, na kotrymž bu, dawši japoštołam, kotrychž bě wuzwolil, prikaznje přez Ducha swjateho, horje wzaty;

3. Kotrymž tež po swojim ćerpjenju sam žiwy so zjewješe we mnohich dopokazach, přez štyrceći dnjow so jim pokazujo a rozmołwjejo wo Božim kralestwje.

4. A z nimi jědžo prikaza jim, zo bychu z Jeruzalema njewotkhadželi, ale čakali na Wótcowe slubjenje, kotrež sće, (praji wón), z mojeho rta slyšeli.\*

Luk. 24, 49; Jan. 14, 26; Mat. 3, 11; Mark. 1, 8; Luk. 3, 16; Jan. 1, 26.

5. Přetož Jan drje je křčil z wodu, wy pak budžeće křćeni z Duchom swjatym po njemnohich tych dnjach.

6. Tuž kotřiž běchu so zešli, prašachu so jeho, prajicy: Knježe, založiš znowa w tomle času kralestwo Israel?

7. Wón pak rjekny jim: Njeje waša wěc, zo byšće časy a khwile znali, kotrež je Wótc postajil w swojej mocy;

8. Ale dóstanjeće móc Ducha swjateho, kotryž na was přińdže, a budžeće mi swědkowje w Jeruzalemje a w cylej Judeji a Samariji a hač do kóncow zemje.\*

Luk. 24, 48.

9. A hdyž bě to prajil, bu wón, jako woni widzachu, pozběhnjeny; a mróćel wza jeho z jich wočow.

10. A hdyž za nim do njebjes spějacym hladachu, hlej, stoještaj dwaj mužskaj pódla nich w bělych drastach,

11. Kotrajž tež praještaj: Mužowje galilejscy, što tu stojíte, do njebjes hladajcy? Tón Jězus, kotryž je před wami do njebjes wzaty, tak zaso přińdže, jako sće widželi jeho do njebjes spěc.

12. Tuž wróćichu so do Jeruzalema z hory, kotraž rěka Wolijowa, kotraž je pódla Jeruzalema, sabatowy puć daloko.\*

13. A hdyž běchu (domoj) přišli, podachu so do wječernje,\* hdžež přebywachu Pětr a Jan, Jakub a Handrij, Filip a Domaš, Bartrom a Matej, Jakub Alfejowy a Syman Zelotes a Judaš (bratr) Jakubowy.

14. Ći wšitecy zwostawachu jednomyslne w modlitwje ze žónskimi, a z Mariju, Jězusowej maćerju, a jeho bratrami.\*

15. **W** tychle dnjach wstanywši mjez bratrami rjekny Pětr (běše pak črjoda ludźi hromadže wokolo sto a dwaceći):

16. Mužowje, bratřa, pismo dyrbi so dopjelnić, kotrež je Duch swjaty wěščil přez rot Davidowy wo Judašu, kotryž bu wjednik tych, kotřiž Jězusa zajachu.

Ps. 40, 10; Jan. 13, 18.

17. Wón bě sobu mjez nas ličeny, a bě dóstal podžěl tuteje služby.\*

18. A tón pak je zaslužil polo ze mzdy swojeje njesprawnosće, a wobwěsywši so rozpukny so wosrjedź, a wukidnychu so wšě jeho črjowa.

I. 1. t. j. evangelium, kotrež je wot toho sameho spisaćela spisane. — 4. t. j. Duch swjaty ze swojimi hnadami, kotryž měješe widžomnje na swjatych japoštołow přińc. — 8. Jězus njewotmołwi japoštołam na jich prašenje, ale praji jeno, zo Duch swjaty na nich přińdže a jich rozswětli; potom spóznaja, zo jeho kralestwo njeje z toho swěta, ale zo je duchowne, kotrež budza rozšěrjeć hač do kóncow zemje. — 12. Tak wjele kroćeli, jako zakon Židam na sabaće činić dowoli. — 13. To bě wulka jstwa, ke kotrež wot deleka skhód wjedžeše a hdžež běchu poslednju wječer z Jězusom swjećili. — 14. t. j. blizkimi krejnymi přecelemi. — 17. t. j. japoštołskeje.